

broj: 02 03 2021
02-1-389-1/2021

**UNIVERZITET U SARAJEVU
FAKULTET POLITIČKIH NAUKA
SARAJEVO**

Na osnovu člana 103. Zakona o visokom obrazovanju ("Službene novine Kantona Sarajevo" broj 33/17, 35/20 i 40/20), člana 201. Statuta Univerziteta Sarajevo, Odluke o usvajanju dinamičkog plana potreba za raspisivanjem konkursa za izbor u zvanje Fakulteta političkih nauka za studijsku 2020/21. godinu (Odluka Vijeća Fakulteta političkih nauka broj 02-1-2014-1/20 od 30.09.2020. godine), Odluke Vijeća Fakulteta političkih nauka Sarajevo broj: 02-1- 2368-1/20 od 14.12.2020. godine i saglasnosti Senata Univerziteta Sarajevo broj: 01-28-28/20 od 23.12. 2020. godine, raspisan je konkurs za izbor akademskog osoblja na Fakultetu političkih nauka u Univerzitetu u Sarajevu na naučnu oblast „Sociologija“ za izbor u zvanje redovnog profesora- 1 izvršilac.

Po zaključenju konkursa, a na osnovu člana 104. Statuta Univerziteta u Sarajevu i prijedloga Odsjeka Sociologije, a u vezi sa članom 106. Stav (1) i (2) Zakona o visokom obrazovanju („Službene novine Kantona Sarajevo broj: 33/17, 35/20 i 40/20), Vijeće Fakulteta političkih nauka Univerziteta u Sarajevu na sjednici održanoj 09.02. 2021. godine donijelo Odluku o imenovanju komisije za izbor nastavnika (Odluka broj:02-1-192-1/21) na naučnu oblast Sociologija na Fakultetu političkih nauka Univerziteta u Sarajevu, u sastavu:

1. Prof.dr. Dželal Ibraković, predsjednik Komisije,
2. Dr. Jusuf Žiga, profesor emeritus, član Komisije,
3. Prof.dr. Šaćir Filandra, član Komisije.

Nakon izvršenog uvida u podnese prijave, Komisija podnosi Vijeću Fakulteta političkih nauka Univerziteta u Sarajevu slijedeći

IZVJEŠTAJ

Konkurs je raspisan na web stranici Fakulteta političkih nauka i web stranici Univerziteta u Sarajevu i objavljen je 18.01.2021. godine, a zatvoren je 02.02.2021. godine.

Na raspisani konkurs za izbor akademskog osoblja – nastavnika u akademsko zvanje redovan profesor na naučnoj oblasti "Sociologija", u zakonom predviđenom roku, prijavile su se dvije kandidatkinje: **dr. sc. Merima Čamo**, za zvanje redovni profesor, a prema Odluci o dinamičkom planu potreba za raspisivanjem konkursa za izbor u zvanje od 30.09.2020. godine, i **dr.sc. Lejla Mušić**, za vanredni izbor (prijevremeni) u zvanje redovni profesor.

Stručna služba Fakulteta političkih nauka smatra, a i Komisija se slaže sa ovim mišljenjem, da je prijava prve kandidatkinje dr.sc. Merime Čamo potpuna i u skladu sa uslovima konkursa, dok je druga prijava kandidatkinje dr.sc. Lejle Mušić blagovremena, ali nepotpuna iz razloga što:

- Nije dostavljena potvrda o uspješno obavljenom mentorstvu za drugi ciklus i doktorski studij, čime se primjenjuje odredba člana 199. Statuta Univerziteta u Sarajevu, u kojoj se naglašava da u slučaju da kandida/kandidatkinja pri izboru u akademsko zvanje iz objektivnih razloga nije mogao/mogla ispuniti uslov objavljene knjige i/ili mentorstva za drugi i/ili treći ciklus studija, uvodi se ekvivalencija odnosno supstitucija objavljene knjige i/ili mentorstva sa tri dodatna naučna rada objavljena u citatnim bazama podataka, u odnosu na minimalne uslove utvrđene zakonom.

Minimalni uslovi za redovan izbor u zvanje redovnog profesora u pogledu broja objavljenih naučnih radova jesu osam. S obzirom da se prof.dr. Lejla Mušić, prijavljuje na Konkurs prije provedenog zakonskog roka od 6 godina u zvanju vanrednog profesora, u obavezi je prema članu 193. Statuta Univerziteta u Sarajevu, dostaviti dodatno dokaz o objavi minimalno 5 naučnih radova dodatno.

Iz svega navedenog prozlaži da je kandidat prof.dr. Lejla Mušić, morala dostaviti ukupno 19 naučnih radova sa dokazom o objavljivanju (8 naučnih radova - za redovan izbor, dodatnih 5 naučnih radova za prijevremeni izbor, dodatna 3 naučna rada kao supstitut za mentorstvo na drugom ciklus, te još dodatna 3 naučna rada kao supstitut za mentorstvo na trećem ciklusu), a sve nakon posljednjeg izbora u zvanje, a što nije učinila. Dostavljeno je 13 naučnih radova sa dokazom o objavi kako je propisano Konkursom, a za neke navedene radove nema dokaza uz prijavu – nedostaje i printani radovi, ali i njihova elektronska forma. Ako bi Komisija i prihvatila sve navedene naučne radove kao kompletne, opet se prijava kandidatkinje dr.sc. Lejle Mušić ne bi mogla uzeti u obzir iz razloga što:

- Kandidatkinja nije dostavila ni potvrda o provedenom izbornom periodu u zvanju vanrednog profesora kako je traženo Konkursnom procedurom (Dostavljen je Odluka o izboru u zvanje vanrednog profesora i Odluka o plaćenom odsustvu);

- U prijavi za Konkurs ne navodi se na koju naučnu oblast se prijavljuje kandidatkinja.

Komisija je pažljivo pregledala sve dostavljene materijale i objavljene radove dr.sc. Lejle Mušić i konstatira da se radi o kvalitetnoj autorici, te se pridružuje prijedlogu Odsjeka za sociologiju koji je podržao da se u ukupnoj politici Fakulteta političkih nauka Univerziteta u Sarajevu u utvrđivanju dinamičkog plana potreba za raspisivanjem konkursa za izbor u zvanje, vodi računa i o vanrednim izborima. Ta potreba nije iskazana u navedenom Dinamičkom planu za studijsku 2020/21 godinu, a redovni izbor, nakon 6 godina provedenih u zvanju vanrednog profesora, za

kandidatkinju dr.sc. Merimu Čamu jeste iskazan, tako da je i ovo, uz izraženo mišljenje stručne službe o nepotpunosti prijave dr.sc. Lejle Mušić, opredijelilo Komisiju da Vijeću Fakulteta političkih nauka u Sarajevu predloži izbor dr.sc. Merime Čamo na raspisani konkurs, bez daljeg razmatranje prijave dr.sc. Lejle Mušić (zbog neispunjavanja formalnih uslova Konkursa).

Kandidatkinja dr.sc. Merima Čamo je dostavila prijavu koja je blagovremena i potpuna sa uslovima utvrđenim u konkursu (potvrda Službe za pravne, kadrovske i pomoćno - tehničke poslove Fakulteta političkih nauka Univerziteta u Sarajevu, broj:02-1-136-1/2021. od 28.01.2021. godine). Uz prijavu na ovaj konkurs kandidatkinja je priložila: biografiju (CV) u printanoj i elektronskoj formi, spisak objavljenih naučnih radova, listu objavljenih knjiga, udžbenika i naučnih radova za izbor akademskog osoblja - nastavnika u zvanje redovan profesor na naučnu oblast "Sociologija", diplomu o naučnom stepenu doktora nauka - ovjerenu fotokopiju diplome fakulteta odgovarajućeg studija za oblast na koju konkuriše — "Sociologija"; ovjerenu fotokopiju diplome nagrada za stručno djelo/prikaz (povodom 45 godina FPN-a Sarajevo), bibliografiju – fotokopije objavljenih naučnih radova (11); originalne primjerke objavljenih publikacija: knjiga (2), zbornik (1), studija (1), priručnik (1); potvrdu/dokaz o jednom provedenom izbornom periodu u zvanju vanredni profesor, potvrde/dokaz o uspješno obavljenom mentorstvu na drugom ciklusu studija, potvrdu/odluku/dokaz o imenovanju za mentora na trećem ciklusu studija (kao supstitut dostavljena tri naučna rada dodatno); dvije potvrde/dokaz o uvrštenim radovima u naučna izdanja koja su u procesu publiciranja.

Biografski podaci

Dr. Merima Čamo rođena je u Sarajevu, Opština Centar, 1971. Na Fakultetu političkih nauka u Sarajevu radi već 24 godine. Na istom fakultetu, čiji je diplomant (diplomirani sociolog) upisuje postdiplomski studij pod nazivom *Bosna i Hercegovina u savremenom svijetu*, odsjek sociologija (školska 1996/97. godina) koji uspješno završava 1999. godine. Od 01. 07. 1997. godine angažovana je kao asistent na predmetima *Etnologija i Sociologija naselja*. U septembru 2003. godine na Fakultetu političkih nauka brani magistarski rad pod naslovom *Tradicija i kultura stanovanja u Sarajevu u XIX vijeku* čime je ispunila uvjete za dodjelu naučnog stepena magistra socioloških nauka. U zvanje višeg asistenta na predmetu *Sociologija naselja* izabrana je 30.06.2004. godine, a na predmetu *Etnologija*, 28.09.2005. godine.

Doktorsku disertaciju pod naslovom *Socio - kulturološke karakteristike bosanskohercegovačkog urbaniteta u XX stoljeću*, kandidatkinja je odbranila 14. 11. 2009. godine, na Fakultetu političkih nauka u Sarajevu, odsjek sociologija. Zvanje docenta na oblasti socioloških nauka stekla je 28.04. 2010. godine. U zvanje vanrednog profesora na naučnoj oblasti socioloških nauka izabrana je 27. 05. 2015. godine.

TREKUTNI ANGAŽMAN:

Predmetni nastavnik na sociološkim disciplinama:

Historija civilizacije, Sociologija porodice, Sociologija mladih, Sociologija urbaniteta.

Značajniji radovi prije izbora u zvanje redovnog profesora:

Autorske knjige:

1. *Kultura stanovanja u Sarajevu (od njegovog nastanka do kraja XIX stoljeća. (2005). Sarajevo: UG Semerkand, Sarajevo. Str. 165, ISBN 9958-9686-4-9.*

Objavljena knjiga – sadržaj:

Knjiga problematizira tradiciju i kulturu stanovanja u Sarajevu kroz optiku kulturno - povijesnog tradicijskog miljea koji se iskazuje prevashodno u specifičnoj organizaciji stambenog prostora u određenim vremenskim periodima. Na stranicama je estetizirano eksplicirana sikretička sprega mentaliteta bosanskog čovjeka sa raspoloživom materijom i prirodnim ambijentom konkretnog socio - egzistencijalnog prostora. Značajna pažnja posvećena je predvečerju XIX stoljeća koje obilježava početak snažnog akulturacionog procesa a koji će serijom difuzionih reakcija utjecati na bitnu transformaciju tradicionalne strukture grada Sarajeva. Ova sociološko - etnološka studija ima 165 stranica, sadržajno obuhvata pet poglavlja zasnovanih na relevantnoj literaturi. Knjiga predstavlja korektnu teorijsku i metodološku elaboraciju fenomena kulture stanovanja u Sarajevu, te njegove akulturacije usljed kontakta islamsko - orijentalnog civilizacijskog kruga sa srednjoevropskim kulturno - povijesnim sistemom koji dospijeva na ove prostore austrougarskom okupacijom.

Objavljena knjiga – sadržaj:

Grad kao višedimenzionalni fenomen sve više zaokuplja sociološku misao čemu uveliko doprinosi činjenica da mnogostruke preobrazbe savremenog društva najvećim djelom proizlaze iz njegovog ubrzanog kretanja ka urbanoj civilizaciji. Poznato je da Bosna i Hercegovina baštini relativno dugu urbanu tradiciju, te se, upravo, u tom temporalnom, materijaliziranom i produhovljenom okviru uočava beskraj spisateljskih motivacija kao i ozbiljnih tematskih izazova – da se pokuša proniknuti u socijalnu slojevitost, intenzitet, te efekte hipermobilnosti i multipotentnosti grada i gradskog načina života na ovom području. Motivaciju/usmjerenje i ovaj nadasve delikatan izazov, koji se, prije svega ogleda u specifičnom postratnom statusu i stanju bosanskohercegovačkih gradova prihvatila je, koncipirala i, na koncu, na svoj način realizirala autorica. Knjiga *Urbana abeceda Bosne i Hercegovine* prezentiran je na 174 stranice teksta. Rukopis obuhvata opis 42 gradska naselja predložena abecednim redom odnosno utvrđenim redosljedom slova u latinici kojim se, po riječima autorice, željela osigurati što bolja preglednost i jasnoća teksta. S druge strane, sama analiza urbanih naselja obuhvata njihov nastanak i postepeni razvoj odnosno njihovu (ko)egzistenciju, padove i uspone kroz različite vremenske periode što se, u prenesenom značenju, može uporediti sa redosljedom/hronologijom i konciznošću simbola/znakova u abecedi. Namjera da se u historijskoj ovojnici, bar u kratkim crtama, osvjetli socijalnoantropološki milje bosanskohercegovačkih gradova odnosno njihov optimum, dinamika, ljudski resursi, privredni potencijal, način života, konfesionalna struktura, društvena (dez)organizacija, kulturološke tvorevine, demografski debalansi itd., potkrepljena je sa 135 bibliografskih jedinica i 16 pristupa web stranicama, uz konsultiranje svih službenih stranica gradova koji su opisani u tekstu. Knjiga je namijenjen široj čitalačkoj publici, ali i naučnim i stručnim radnicima koji se prirodnom profesije (ili na drugi način) angažuju u proučavanju urbanosociološke problematike. Po svom opusu i načinu iznošenja činjenica i informacija, radi se djelu koje u osnovi predstavlja sociološku elaboraciju grada utemeljenu na historiografskim, etnološkim, antropološkim, ekonomskim i drugim relevantnim činjenicama. Uz sve rečeno, neophodno je istaknuti da ova forma znanstveno - istraživačkog rada (monografija) i u ovom obimu, rijetko kad rezultirala individualnim angažmanom. Kao rezultat višegodišnjeg, marljivog prikupljanja podataka, istraživanja i

bavljenja historijom, etnologijom i primarno sociourbanom problematikom, *Urbana abeceda Bosne i Hercegovine* predstavlja istinsku riznicu znanja i podataka o gradovima Bosne i Hercegovine. Po svojoj tematskoj orijentaciji i sadržaju ima potencijal da se u akademskim sredinama izučava u oblasti sociologije naselja, sociologije sela, sociologije grada, etnologije i historije.

Radovi od izbora u zvanje vandrednog profesora (od maja 2015. godine):

Autorske knjige:

1. *Sociologija urbaniteta. (2016). Sarajevo: Vlastita naklada uz finansijsku pomoć Fakulteta političkih nauka u Sarajevu. Str.159, ISBN 978-9926-408-90-9.*

Objavljena knjiga – sadržaj:

Prije nego se potrebe i interesi pojedinca na najbolji način zadovolje, pri čemu je poželjno pokazati zrelost, odgovornost i određeni nivo senzibiliteta za elemente i sile svog socijalnog okruženja, čovjek kao da se mora proaktivno (pre)lomiti u stotine dijelova tako da se svaki tračak sklonosti ka nečem, svako vlakno posebnog interesovanja, želja i težnji mora isfiltrirati u primarnom locusu tj. specifičnom prostoru kolektiviteta/zajednice svojstvenog društvu u kojem pojedinac egzistira: *ruralno, urbano; tradicionalno, moderno*. Tradicionalne prakse, konvencija, predrasude, lokalna integracija (rodbinski i susjedski odnosi i aranžmani) imanentni seoskoj sredini u okviru koje se stječe iskustvo kroz stvaranje osjećaja „mi“ neminovno se rastapa u širem, atraktivnijem, smjelijem, dinamičnijem, organiziranijem antroposocijalnom okruženju tačnije prostoru koji vodi legitimizaciji individualizacije tj. osjećaju „ja“ a to je (vele)grad i gradski način života (urbanitet). „Ja“ se afirmira kroz izdiferencirane grupe, sadržaje, trendove, stanja, mogućnosti ali i pravila (što opet može voditi ka otuđenju) koja neosporno rađa, aktualizira i konkretizira urbana stvarnost, datost, neizbježnost, izbor i/ili gotovo sudbinski model ljudskog egzistiranja u savremenom društvu a to je grad.

Dakle, urbani život sam po sebi je mozaik složen od niza detalja koji se mogu uočiti, jer se tako i ispoljavaju, na različitim nivoima. Poznato je da u urbanom svijetu egzistira veliki broj društvenih pojava, odnosa i procesa koji su u interaktivnom odnosu. Manifestacija tog međudjelovanja izravno utječe na stvaranje ili preoblikovanje gradskog života. Urbanitet je, kako naglašava autorica, "dinamična kategorija koju u biti određuje

korpus socijalnih aktivnosti kao što su: produkcionni odnosi, političko uređenje, religijska uvjerenja, odnos prema tradiciji, preferiranje određenih kulturnih stilova, adekvatnost stambenih i radnih uslova, mnogobrojni socijalni angažmani pojedinaca i grupa, različite individualne i kolektivne aspiracije, razvoj nauke, tempo razvoja urbane zajednice, način korištenja slobodnog vremena ali i devijantno ponašanje, anomalije grada itd." Dakle, urbanitet predstavlja specifičan obrazac življenja koji objašnjava jedan poseban tip ljudskih naselja. „Urbanitet je *fenomen u fenomenu*“, što je u osnovi i glavna tema prezentiranog djela. Knjiga je podijeljena u dva dijela koja premrežavaju različita tematska uporišta, fenomen tvorevine i primaprocese, zalazeći time u samu srž zadate problematike, krajnje korektno, a sve kroz prizmu sociološkog poimanja urbaniteta i urbane kulture kao okosnice istog.

Knjiga ima sve karakteristike nastavne i udžbeničke literature, te nudi pregršt saznanja o gradu i gradskom načinu života. Pored znanstvene i stručne ozbiljnosti koja dominira problematikom tekst studije reflektira i visoku motivacijsku razinu, prijemčivost, poticajnost, senzibilitet, osjećaj za bilo, aritmiju i mijene urbanog bića; podstiče nas na misao o gradu u kojem živimo ali ga više ne doživljavamo. Čitav niz fenomena se nalazi pod tom lupom, prati se uzrok i posljedica, međudjelovanje, stanja i procesi bez primjese zbunjenosti tom fenomenološkom kompleksijom. Grad nam postaje blizak, otvoren, pristupačan, u svoj svojoj dinamici...jednostavno "naš".

Sadržaj knjige je u nekoliko segmenata je pionirski rad u okvirima bosanskohercegovačke urbanosociološke misli. Sociologija urbaniteta će svakako doprinijeti svestranijem i razumljivijem pristupu tematici urbanog koja se na našim prostorima znanstveno nedovoljno tretira, bar ne na način koji to zahtijeva i zaslužuje.

2. *Gradski način života u Bosni i Hercegovini. (2019). Sarajevo: Vlastita naklada.* Str. 199, ISBN 978-9926-466-63-3.

Objavljena knjiga – sadržaj:

Tema knjige pod naslovom *Gradski način života u Bosni i Hercegovini* situirana je u jedan od ključnih segmenata problematike urbanog, a to je način života koji je grad iznjedrio. Osnovne karakteristike tog izuzetno složenog procesa autorica je nastojala

objasniti u antroposocijalnom prostoru Bosne i Hercegovine čije postojanje seže duboko u prošlost, sa viševjekovnom tradicijom. Gradski način života (urbanitet) je polisintetičan proces trajnog karaktera, determiniran prije svega prirodnim i društveno - kulturnim činiocima. Na toj osnovi formira se konzistentan obrazac ponašanja i mišljenja imanentan gradskoj sredini koji je u stalnom međudejstvu sa svim aspektima ljudskog života. Urbanitet u sebi sadrži tradicijski supstrat koji čini relevantno polazište za uspješno definiranje grada u cjelosti, bilo da se radi o ruralnoj ili urbanoj sredini, jer definiranje grada podrazumijeva definiranje sela; ono je njegova iskonska iskra, jezgro i stalni dotok vitaliteta, kako po prirodnim resursima tako i populacijski.

Upravo, kao krajnji produkt ruralno - urbanog previranja, javlja se realistična slika grada i gradskog načina života (*urbaniteta*), koji postupno apsorbiraju tok, put i način svog postanka. Ovaj organizirani prostor postaje *centrum* društvenih dešavanja, te nezaustavljivim snopom reverzivne energije obuhvata i iznova mobilizira sve one modificirane i multiplicirane faktore s prefiksom urbani, koji su ga, u suštini, i odredili, kao što su: vremenski, demografski, politički, ekonomski, kulturni, religijski...integrirajući ih u urbanu zajednicu, sprečavajući tako njihovu dislokaciju unutar referentnog urbanog okvira.

Bavljenje gradom uvijek teži istom cilju – doprijeti do njegove duhovne i fizičke okosnice, dokučiti njegov ritam, ispitati i eventualno iskusiti način života koji se u njemu odvija(o), opisati njegove ljepote i možda skinuti patinu sa zaboravljenih događaja i znamenitosti pod njegovim okriljem. Ta svojevrsna riznica opažanja, vrednovanja, datiranja, opisivanja (pisane forme, arheološke zbirke, dokumenti pravnog karaktera, fotografije itd.) i, na koncu, popredmećenja čovjeka/građanina i njegovog aktiviteta u okvirima konkretnog tipa naselja, u datom periodu, podstaknula je, i umnogome omogućila budućem čitaocu jednu sveobuhvatniju urbanosociološku optiku. Njegov sadržaj podijeljen je u dvije cjeline sa četiri podpoglavlja, uz Zaključna razmatranja i Literaturu.

Prema autorici, urbana raznovremenost imanentna prostoru Bosne i Hercegovine, gradovi i njima svojstven način života, rezultat su kontakta, preplitanja, stapanja i miješanja unutarnjih (domaćih) i izvanjskih (tudih) elemenata, koji su, u različitim vremenskim razdobljima, intendirali na autohtone obrasce, oblikujući specifične forme, odraze i stanja kroz složene procese kulturnog kontakta – akulturacije. Ovi kompleksni procesi su na diferentne načine preobražavali, nadopunjavali i inovirali postojeći urbanitet koji je, ranije uspostavljenim društvenim mehanizmima, akumulirao dragocjene valere prošlosti i vrijedna iskustva koja su se u urbanim sredinama stjecala kroz uvažavanje

drugog i drugačijeg, odgovornost spram sebe i drugih, građansku dobronamjernost, njegovanje principa solidarnosti, otvorenost i interakciju, a sve to u jednoj urbanoj hronologiji u kojoj se perfekt i prezent, tradicionalno i moderno sintetiziralo u niz kvalitativno novih obilježja urbaniteta.

Prezentirani tekst zasnovan je na ideji da se u historijskoj perspektivi osvijetli konstituisanje i održivost gradskog načina života na našim prostorima (od antičkog perioda pa sve do postranzicijskog previranja u bosanskohercegovačkoj zbilji).. Knjiga nudi jedan sasvim novi pristup gradskog života na našim prostorima kroz prizmu starog, prošlog, proživljenog, nasljeđenog kao i osavremenjenog tačnije kroz evoluciju bosanskohercegovačkih gradova i svakako će biti od velike koristi kako u edukaciji studenata, tako i šire čitalačke publike.

3. *Uvod u sociologiju*. (2021). *Odsjek sociologije. Grupa autora*. (ur. Adnan Džafić, Asim Mujkić, Sarina Bakić). Sarajevo: *Fakultet političkih nauka. Poglavlje: Ruralna i urbana sociologija*. (Potvrda uredništva).

Opis knjige/udžbenika:

Sociologija je znanost o društvu: o postanku, dinamici, naravi, cilju, potrebama, te kolektivnim interesima i uvjerenjima istoga, koja nam prikazuje načela i zakone, po kojima se društvo razvija, u svrhu realiziranja zadatih, kolektivnih ciljeva, koji su opšte dobro. Teorijsko poniranje u prirodu društva, nije samo seciralo nastupajuće procese i stanja koja iz njih proizlaze, reflektirajući se ponajviše u fenomen tvorevinama nego je nastojalo sociologiju situirati u red aplikabilnih disciplina. Namjera (ko)autora *Uvoda u sociologiju* bila je, kroz opšti i dakako simplificiraniji koncept, studentima sociologije približiti područje njihove buduće profesije nastavnim sredstvom koje prezentira/izlaže gradivo utvrđeno nastavnim planom i programom. Knjiga ima karakter udžbenika, temeljnog nastavnog sredstva u aktivnoj nastavi i namijenjena je učenju i stjecanju znanja, te omogućuje međupredmetnu povezanost odnosno povezanost s međupredmetnim tematskim jedinicama koje se, u sklopu drugih predmeta, izučavaju na odsjeku sociologije. Pored Uvoda i Zaključka, *Uvod u sociologiju* sukusno obuhvata sljedeće tematske cjeline „Priroda“ ljudskog društva-socijalna ontologija, *Predmet i metode sociologije, Razvoj društva i društvo u transformaciji, Sociologija kao znanost, Sociološka teorija, Društvo i kultura, Društvo i religija, Društvo i stanovništvo, Savremena porodica i tradicija, Ruralna i urbana sociologija, Društvene nejednakosti i siromaštvo, Društvene promjene, Obrazovanje i društvo itd.*

Knjiga sadrži i četiri republikacije koje tematski korespondiraju sadržaju. Na kraju svake tematske cjeline/poglavlja naznačen je prikaz relevantne korištene literature i literature za dalje čitanje. Zastupljeni tekstovi su prikladni za sve jezičke nivoe (znanstveni, didaktičko – metodički, mikronarativni itd.) i primjereni studentima prve godine studija, odsjeka sociologije.

Naučni članci:

1. Čamo, Merima, Osmić, Amer. *Dječja igra u kibernetičkom dvorištu*. (2020). *Društvene i humanističke studije DHS. Časopis Filozofskog fakulteta u Tuzli*. Broj XIII. Str. 367-380, ISSN 2490-3604.
2. Čamo, Merima. *Sociološke karakteristike nastanka i razvoja osnovnih elemenata stripa*. (2020). *Sarajevski žurnal za društvena pitanja (Sarajevo Social Science Review[SSSR])*. Godište IX, broj 1. Sarajevo: *Fakultet političkih nauka Univerzitet u Sarajevu*. (Online izdanje). (Potvrda urednika).
3. Čamo, Merima. (2020). *Sociologija grada i gradskog načina života*. U *Pola stoljeća sociologije u Bosni i Hercegovini : zbornik radova / autori Dželal Ibraković ... [et al.]*. Čamo Merima, Amer Osmić (ur.). Sarajevo: *Fakultet političkih nauka*. Str. 35-45, ISBN 978-9958-598-97-5.
4. Čamo, Merima. *Kustosi društva*. (2020). U *Pola stoljeća sociologije u Bosni i Hercegovini: zbornik radova / autori Dželal Ibraković ... [et al.]*. Čamo Merima, Amer Osmić (ur.). Sarajevo: *Fakultet političkih nauka*. Str. 125-128, ISBN 978-9958-598-97-5.
5. Čamo, Merima. (2020). *Strip u dijalektici modernog djetinjstva*. *Pregled, Godište LXI, br. 1. januar - april*, Sarajevo: *Univerzitet u Sarajevu*. Str. 75-83, ISSN 0032-7271.
6. Čamo, Merima, Osmić, Amer. *Pojam i značaj povjerenja u odnosu student – nastavnik: sociološki diskurs. Dvojezična verzija. (The concept and importance of trust in the student – teacher relationship: Sociological discourse)*. (2020). *Sociološki diskurs*. Banja Luka: *Naučno udruženje Sociološki diskurs*. Broj 19. Str.67-80, ISSN 2232-867X.
7. Osmić Amer, Čamo Merima. (2020). *Sociodemografska obilježja bosanskohercegovačke omladine*. *Pregled, Godište LXI, br.3. septembar - decembar*, Sarajevo: *Univerzitet u Sarajevu*. Str. 29-40. ISSN 0032-7271.
8. Bakić Sarina, Čamo Merima. (2020). *Overcoming of Prejudices and Stereotypes in Multicultural Society and Media Literacy*. *SunText Rev Arts Social Sci 1(2): 111. (PDF)*. ISSN 2766-4600. (Online). <https://suntextreviews.org/journals/suntext-review-of-arts-social-sciences/current-issue>
9. Čamo, Merima. (2019). *Društvena (re)distribucija ruralnih resursa između dva svjetska rata na prostoru Bosne i Hercegovine i njena aktuelizacija*. *Godišnjak BZK „Preporod“*, Godina XIX. Sarajevo: *Bošnjačka zajednica kulture „Preporod“*. Str. 17-30, ISSN 1512-8180.

10. Čamo, Merima, Sofradžija, Halima (2019). *Sociološke karakteristike povjerenja kao vrijednosnog konstrukta. U Izgradnja povjerenja između studenata i profesora. Amer Osmić ... [et al.]. Sarajevo :Fakultet Političkih nauka u Sarajevu. Str.15-23, ISBN 978-9958-598-92-0. U istoj studiji: Čamo, Merima. (2019). Početni i pristupni dio rada/studije - I; h.završni dio rada/studij-VIII). U Izgradnja povjerenja između studenata i profesora. Amer Osmić ... [et al.]. Sarajevo : Fakultet Političkih nauka u Sarajevu. Str.7-8 i 61, ISBN 978-9958-598-92-0.*
11. Čamo, Merima. (2015). *Nasilje u porodici i medijacija u vjerskim zajednicama. U Sprječavanje i suzbijanje nasilja u porodici kroz primjenu medijacije u crkvama i vjerskim zajednicama u Bosni i Hercegovini. (A. Azra Adžajić-Dedović, H. Sofradžija, M. Čamo, I. Deljković, Ž. Topić, D. Martinović, T. Humačkić, S. Stočanin-Hrustemović, A. Pandžo i S. Gavrić). Sarajevo: Maunagić d.o.o. - mauna-Fe, Biblioteka Viktimologija. Str. 18-25, ISBN 978-9958-681-42-5.*

Recenzirani rukopis i prikazi knjiga:

Recenzije:

1. Recenzija za publiciranje knjige i recenzija za univerzitetski udžbenik (Odluka 20.11.2018./Univerzitet u Zenici, Filozofski fakultet) pod naslovom *Kulturni modeli odgajanja - uvod u antropologiju porodice* autora Amela Alića. (izdavač: Perfecta, Sarajevo, 2018.).

Prikaz/osvrt:

1. Prikaz knjige *Kulturni modeli odgajanja - uvod u antropologiju porodice*. Amel Alić. (2018). Sarajevo: Perfecta. Naslov objavljenog prikaza: *Antropologija porodice i porodičnog života*. (2019). U *Obrazovanje odraslih. Br. 2. Vol. XIX*. Sarajevo: JU Bosanski kulturni centar Kantona Sarajevo. OJ Bosanski kulturni centar Sarajevo. ISSN 1512-8784, 125 - 128.

Naučno - Istraživački projekti:

Izgradnja povjerenja između studenata i profesora – Voditeljica projekta za naučno - istraživački rad. (Pokrovitelj Ministarstva za obrazovanje, nauku i mlade Kantona Sarajevo 2018/2019. u saradnji sa Fakultetom političkih nauka u Sarajevu).

Opis projektnih aktivnosti:

Projektne aktivnosti su sprovedene na *Faultetu politički nauka u Sarajevu Univerziteta u Sarajevu* sredinom 2019. godine. U istraživanju je učestvovalo ukupno 295 ispitanika od toga 60,3% muškaraca i 39,7% žena. Najčešća starost ispitanice ciljne populacije je 20 godina, dok je prosječna starost 22,5 godina. Ciljnu populaciju činili su studenti, dok je metodologija istraživanja predviđala da se tokom terenskog rada i analize dobijenih podataka dobiju podaci proizišli iz stavova, viđenja, iskustva i mišljenja studenata o fenomenu povjerenja i njegovoj izgradnji u akademskom okruženju. Podaci za potrebe istraživanja prikupljeni su tehnikom ankete i instrumentom anketnog upitnika koji je ciljnoj populaciji distribuiran u formi lice u lice ili grupnim/individualnim popunjavanjem upitnika. Mjerni instrument sastojao se od skupina tvrdnji na kojima su ispitanici izražavali svoje stavove, imajući na raspolaganju sljedeće opcije: u potpunosti se slažem, ne slažem se, niti se slažem niti se ne slažem, slažem se i u potpunosti se slažem. Za statističku analizu podataka korišten je softverski paket SPSS (Statistical Package for the Social Sciences). Istraživanjem su obuhvaćeni studenti svih odsjeka - Sociologija, Politologija, Sigurnosne i mirovne studije, Socijalni rad i Komunikologija. Ispitanici su shodno broju i studijskom usmjerenju u uzorku činili grupe od I do V godine, odnosno I i II ciklusa studija. *Istraživanje je rezultiralo sociološkom studijom pod naslovom Izgradnja povjerenja između studenata i profesora (2019).* (Istraživački tim/autori: Amer Osmić, Merima Čamo, Abdel Alibegović, Lejla Turčilo, Halima Sofradžija, Enita Čustović/lektor). Sarajevo: *Univerzitet u Sarajevu Fakultet političkih nauka*. Str.70, ISBN 978-9958-598-92-0.

Pojedinačno – konkretno izdanje publikacije – uredništvo:

Pola stoljeća sociologije u Bosni i Hercegovini: zbornik radova / autori Dželal Ibraković ... [et al.]. Urednici: Čamo Merima, Amer Osmić. Sarajevo: *Fakultet političkih nauka*. Str. 149. ISBN 978-9958-598-97-5.

Objavljena publikacija - sadržaj:

Zbornik radova se znanstveno kvalificira kao publikacija koja sadrži više samostalnih priloga raznih autora koji su najčešće napisani samo za tu publikaciju i koji su povezani u jednu ediciju pod jedinstvenim naslovom u ovom slučaju *Pola stoljeća sociologije u Bosni i Hercegovini*. U Zborniku je, pored Uvoda, objavljeno jedanaest radova; osam tekstova i dva prikaza potpisuju članovi/profesori odsjeka sociologije, Fakulteta političkih nauka u Sarajevu. Prikaz jedne od

knjiga je rad studenta Drugog ciklusa studija sociologije. Uvrštene su i tri republikacije u formi prikaza. Znanstvena misija sociologa je da u odabranom istraživačkom polju kritički, objektivno i relevantno prosudi, vrednuje i ocijeni aktuelne pojave i procese u društvu, te da meritorno istupi sa spoznajnim sadržajima u znanstvenu javnost. Iz toga proizlazi izuzetno velika znanstveno - stručna, moralna i društvena odgovornost. U tom smislu *Zbornik* ispunjava zadati kriterijum i premežava aktuelnu problematiku, i to ne samo u oblasti sociologije nego tematski ponire i u druge znanstvene oblasti. U skladu sa praksom naučno-istraživačkog rada, u *Zborniku* je primjenjeno više naučnih i istraživačkih metoda (metoda analize i kompilacije, metoda sinteze, metoda indukcije, metoda deskripcije itd.). Sistematski i koncizno su prezentirani najvažniji rezultati istraživanja u zadatim problemskim kontekstima dok su u zaključcima docirani konkretni prijedlozi i predviđanja.

Konferencije:

1. *Prva međunarodna viktimološka konferencija u Bosni i Hercegovini, Ambasadori mira u Bosni i Hercegovini. Sarajevo. (2015). Organizatori: Maunagić d.o.o. Sarajevo, Pravni fakultet Univerziteta u Bihaću, INF IKM Skoplje, IPRA Istanbul. (Prezentirana tema: Nasilje u porodici i medijacija u vjerskim zajednicama). Publicirano u Priručnik za cjeloživotno učenje/ publikacija prve viktimološke konferencija u Bosni i Hercegovini: Sprječavanje i suzbijanje nasilja u porodici kroz primjenu medijacije u crkvama i vjerskim zajednicama u Bosni i Hercegovini. (2015). (A. Azra Adžajić-Dedović, H. Sofradžija, M. Čamo, I. Deljković, Ž. Topić, D. Martinović, T. Humačkić, S. Stočanin-Hrustemović, A. Pandžo i S. Gavrić). Sarajevo: Maunagić d.o.o. - mauna-Fe, Biblioteka Viktimologija. Str. 108, ISBN 978-9958-681-42-5.*
2. *Druga međunarodna naučna viktimološka konferencija u Bosni i Hercegovini, Ambasadori mira u Bosni i Hercegovini. Sarajevo. (2017). Organizatori: Univerzitet u Bihaću, Institute of Knowledge Management/Institut za upravljanje znanjem (IKM) Skoplje, Udruženje medijatora Bosne i Hercegovine, Istraživački centar Banja Luka. (Članica naučnog savjeta konferencije).*

Ostale relevantne aktivnosti (mentorstva):

Mentorstva - doktorski studij, master teze, II ciklus studija (3+2):

Mentorstvo na doktorskom studiju: *Odluka o imenovanju mentor za izradu doktorske disertacije pod naslovom Sociokulturna pauperizacija grada krajem 20. i početkom 21. stoljeća kandidata Admira Gušića, MA. (14. 03. 2019./Univerzitet u Sarajevu, Fakultet političkih nauka).*

Priložena potvrda iz Studenske službe a na osnovu službene dokumentacije koja se nalazi u Sekretarijatu Fakulteta političkih nauka u Sarajevu (odgovorno lice - stručni saradnik Edina Vrabac) kojom se potvrđuju mentorstva pri izradi i odbrani magistarskih radova na Odsjeku Sociologija (3+2) za tri kandidata (**zaključeno rednim brojem tri**) i jednog kandidata koji je odbranio diplomski rad/predbolonjski program studija (**zaključeno rednim brojem jedan**).

Priložena potvrda iz Studenske službe a na osnovu službene dokumentacije koja se nalazi u Sekretarijatu Fakulteta političkih nauka u Sarajevu (odgovorno lice - stručni saradnik Vahdeta Hodžić) kojom se potvrđuje mentorstvo pri izradi i odbrani magistarskog rada na Odsjeku Politologija (3+2) za jednog kandidata (**zaključeno rednim brojem jedan**).

Nastavno – pedagoški rad:

Polja akademskog interesovanja kandidatkinje dr. sc. Merime Čamo traže svoje osnovne disciplinarnе oslonce u sociologiji. Svoj istraživački rad u oblasti ove društvene nauke fokusirala je na njene posebne grane: sociologiju naselja (s preferencijama na urbanu sociologiju), sociologiju mladih i sociologiju porodice. Jedno od polja interesovanja koje kontinuirano pronalazi mjesta u širem akademskom interesu kandidatkinje je i sociokulturna antropologija odnosno etnologija što se očitava kako teorijski tako pristupom u pojedinim dijelovima autorskih knjiga. Upravo, sociolog nikad nije ograničen, niti smije biti u izboru tema koje analizira sve dok je njegov rad u okvirima znanstvene relevantnosti a to u ovom slučaju svakako jeste. Časopisi i publikacije u kojima je kandidatkinja objavila naučne radove prate relevantnu bazu podataka, te potrebnu institucionalnu verifikaciju. Tokom više od dvije decenije nastavno - pedagoškog rada kompetentno i predano je pristupala prenosu znanja studentima nastojeći isto oplemeniti nadograđivanjem, inoviranjem i sveobuhvatnijim pristupom, što je u nastavnoj praksi rezultiralo dodatnom akademskom i radnom motivacijom, kako za studente tako i za nastavni kadar/kandidatkinju. Prema ocjeni studenata a na osnovu svih dosadašnjih evaluacija Bachelor i Master studija, kandidatkinja, je ocijenjena kao izuzetno kvalitetan predavač i pedagog, te kao dostupan i korektan konsultant i mentor u procesu prijave, izrade i odbrane izabranih teza. Prosječna ocjena od strane studenata u svim dosadašnjim evaluacijama je 4,84. Iako kandidatkinja ima odluku o imenovanju mentorice za izradu doktorske disertacije koja joj je omogućila da opravda taj status zasnovan na uspješnoj akademskoj saradnji i povjerenju na relaciji mentor-ica – kandidat, iz objektivnih razloga

nije/nisu u potpunosti realizirali sve faze predviđene za finaliziranje disertacije. Stoga je kandidatkinja kao ekvivalent za izostalo mentorstvo priložila tri naučna rada koji su se u procesu naučne kategorizacije nominirali kao izvorni radovi (Naučni radovi/ r.b. 1., 6., 7.)

Komisija konstatira da je prijedlog za izbor kandidatkinje dr. sc. Merime Čamo u skladu sa Dinamičkim planom napredovanja u viša zvanja koji je donešen na nivou Fakulteta političkih nauka, a utvrđen na prijedlog Odsjeka za Sociologiju sa sjednice (Zapisnik sjednice Odsjeka od 08.12.2020. godine).

ZAKLJUČAK I PRIJEDLOG KOMISIJE:


Na osnovu svega izloženog, Komisija za izbor akademskog osoblja - nastavnika u zvanje redovni profesor na naučnu oblast "Sociologija", po raspisanom konkursu, smatra da kandidatkinja dr. Merima Čamo ispunjava sve uvjete propisane Zakonom o visokom obrazovanju za izbor u zvanje redovni profesor.

Stoga Komisija sa zadovoljstvom predlaže Vijeću Fakulteta političkih nauka Univerziteta u Sarajevu da se prihvati ovaj Izvještaj i da dr. sc. Merimu Čamo izabere u zvanje redovnog profesora na naučnu oblast "Sociologija", te da prijedlog prosljedi Senatu Univerziteta u Sarajevu u dalju proceduru.


Sarajevo, 05.03. 2021. godine

KOMISIJA:

1. Prof. dr. Dželal Ibraković, redovni profesor, predsjednik,



2. Prof. dr. Jusuf Žiga, profesor emeritus, član,



3. Prof. dr. Šaćir Filandra, redovni profesor, član.